

## საარჩევნო ბლოკის

„ნინო ბურჯანაძე - დემოკრატიული მოძრაობა“

### წესდება

ჩვენ, ერთი მხრივ ა(ა)იპ მოქალაქეთა პოლიტიკური გაერთიანება „დემოკრატიული მოძრაობა-ერთიანი საქართველოს“ თავმჯდომარე დავით ასპანიძე (პ/ნ და ა(ა)იპ მოქალაქეთა პოლიტიკური გაერთიანება „გაერთიანებული დემოკრატიული მოძრაობის“ თავმჯდომარე ნინო ბურჯანაძე (პ/ნ ვხელმძღვანელობთ რა საქართველოს ორგანული კანონის საქართველოს საარჩევნო კოდექსის 114-ე მუხლით, 2016 წლის 8 ოქტომბერს დანიშნული საპარლამენტო არჩევნებისთვის სრული ნებაყოფლობითობის საფუძველზე, წინამდებარე დოკუმენტზე ხელმოწერით ვთანხმდებით საარჩევნო ბლოკის - „ნინო ბურჯანაძე - დემოკრატიული მოძრაობა“ შექმნაზე და არჩევნებში ბლოკის სახით მონაწილეობაზე.

### მუხლი 1.

#### საარჩევნო ბლოკის სახელწოდება

საარჩევნო ბლოკის სახელწოდებაა „ნინო ბურჯანაძე - დემოკრატიული მოძრაობა“

### მუხლი 2.

#### საარჩევნო ბლოკში გაერთიანებული პარტიები

საარჩევნო ბლოკი - „ნინო ბურჯანაძე - დემოკრატიული მოძრაობა“ აერთიანებს საქართველოს ცენტრალურ საარჩევნო კომისიაში რეგისტრირებულ პარტიებს: 1. ა(ა)იპ მპგ „დემოკრატიული მოძრაობა - ერთიანი საქართველო“ და 2. ა(ა)იპ მპგ „გაერთიანებული დემოკრატიული მოძრაობა“.

### მუხლი 3.

საარჩევნო ბლოკის ხელმძღვანელი თანამდებობის პირი და მისი უფლებამოსილება

საარჩევნო ბლოკის - „ნინო ბურჯანაძე - დემოკრატიული მოძრაობა“ ხელმძღვანელი თანამდებობის პირია ა(ა)იპ მპგ „გაერთიანებული დემოკრატიული მოძრაობის“ თავმჯდომარე ნინო ბურჯანაძე

საარჩევნო ბლოკის ხელმძღვანელის უფლებამოსილება შეუზღუდავია და მას უფლება აქვს განახორციელოს საქართველოს ორგანული კანონის საქართველოს საარჩევნო კოდექსით საარჩევნო სუბიექტის ხელმძღვანელი პირისათვის მინიჭებული უფლებამოსილებანი.

### მუხლი 4.

საარჩევნო ბლოკის მიერ გადაწყვეტილებათა მიღების წესი, მათ შორის, ბლოკში ახალი პარტიის მიღების, ბლოკიდან პარტიის გასვლისა და გარიცხვის, ბლოკის მიერ წარმომადგენლობითი ორგანოს წევრობის კანდიდატთა წარდგენისა და წარდგენის გაუქმების წესი

1. საარჩევნო ბლოკში - „ნინო ბურჯანაძე - დემოკრატიული მოძრაობა“ გადაწყვეტილებები მიიღება ა(ა)იპ მპგ „დემოკრატიული მოძრაობა - ერთიანი საქართველოსა“ და ა(ა)იპ მპგ „გაერთიანებული დემოკრატიული მოძრაობის“ ერთობლივად შეთანხმებული ზეპირი გადაწყვეტილებით, რომელიც ფორმდება საარჩევნო ბლოკის „ნინო ბურჯანაძე - დემოკრატიული მოძრაობა“ ხელმძღვანელი თანამდებობის პირის წერილობითი გადაწყვეტილებით, რაც იმავდროულად საარჩევნო ადმინისტრაციაში წარსადგენი დოკუმენტია.
2. საარჩევნო ბლოკში ახალი პარტიის მიღებაზე გადაწყვეტილებას ღებულობენ ა(ა)იპ მპგ „დემოკრატიული მოძრაობა - ერთიანი საქართველოს“ და ა(ა)იპ მპგ „გაერთიანებული დემოკრატიული მოძრაობის“ ხელმძღვანელი ორგანოები.
3. საარჩევნო ბლოკიდან გასვლა ნებაყოფლობითია, რომელიც გასვლის სურვილის მქონე სუბიექტის მხრიდან წერილობითი ფორმით უნდა ეცნობოს საარჩევნო ბლოკს და საქართველოს ცენტრალურ საარჩევნო კომისიას.

4. საარჩევნო ბლოკიდან ბლოკში შემავალი პარტიის გარიცხვაზე გადაწყვეტილებას იღებს საარჩევნო ბლოკის ხელმძღვანელი თანამდებობის პირი.
5. საარჩევნო ბლოკის მიერ საქართველოს პარლამენტის წევრობის კანდიდატთა წარდგენასა და წარდგენის გაუქმებაზე გადაწყვეტილებას იღებს საარჩევნო ბლოკის ხელმძღვანელი თანამდებობის პირი.

#### **მუხლი 5.**

##### **საარჩევნო ბლოკის დოკუმენტაციაზე ხელმოწერის უფლებამოსილება**

ყველა სახის საარჩევნო დოკუმენტაციაზე ხელმოწერის უფლებამოსილება მინიჭებული აქვს საარჩევნო ბლოკის ხელმძღვანელს, მპგ „გაერთიანებული დემოკრატიული მოძრაობის“ თავმჯდომარეს, ნინო ბურჯანაძეს.

#### **მუხლი 6.**

##### **საარჩევნო ღონისძიებებთან დაკავშირებით საარჩევნო ბლოკში**

##### **გაერთიანებული ერთ-ერთი პარტიის გამოყენების წესი**

ყველა სახის საარჩევნო დოკუმენტაციაზე უფლებამოსილი პირის ხელმოწერა დამოწმებული იქნება მპგ „დემოკრატიული მოძრაობა - ერთიანი საქართველოს“ მრგვალი ბეჭდით.

#### **მუხლი 7.**

##### **საარჩევნო ბლოკის საარჩევნო კამპანიის ფონდის ანგარიშის განსაზღვრა**

საარჩევნო ბლოკის - „ნინო ბურჯანაძე - დემოკრატიული მოძრაობა“ საარჩევნო კამპანიის ფონდის ანგარიშად ბლოკში შემავალი პარტიები გამოიყენებენ მპგ „დემოკრატიული მოძრაობა - ერთიანი საქართველოს“ კომერციულ ბანკში არსებულ საბანკო ანგარიშის ნომერს, საარჩევნო კამპანიის პერიოდში ფონდიდან ხარჯების გაწევის მიზნით.

## მუხლი 8.

### საარჩევნო კამპანიის ხარჯებზე პასუხისმგებელი პირების, მმართველისა და ბუღალტრის დანიშვნის წესი

საარჩევნო ბლოკის სახელით, საარჩევნო კამპანიის ხარჯებზე პასუხისმგებელი პირია საარჩევნო კამპანიის ფონდის მმართველი და ფონდის ბუღალტერი. საარჩევნო კამპანიის ფონდის მმართველია: აკაკი კიკვაძე,

საარჩევნო კამპანიის ფონდის ბუღალტერია: ნანა ბარნაბიშვილი,

საარჩევნო კამპანიის ფონდის მმართველს და ბუღალტერს თანამდებობაზე ნიშნავს და ათავისუფლებს საარჩევნო ბლოკის ხელმძღვანელი, ნინო ბურჯანაძე.

## მუხლი 9.

### არჩევნებში მონაწილეობისათვის რიგითი ნომრის განსაზღვრის საკითხი

2016 წლის 8 ოქტომბერს დანიშნული საპარლამენტო არჩევნებისათვის საარჩევნო ბლოკი - „ნინო ბურჯანაძე - დემოკრატიული მოძრაობა“ მიმდინარე არჩევნებში მონაწილეობას მიიღებს ნომრით - „3“, რომელიც მპგ „გაერთიანებულ დემოკრატიულ მოძრაობას“ მინიჭებული ჰქონდა უკანასკნელი 2014 წლის ადგილობრივი თვითმმართველობის წარმომადგენლობითი და აღმასრულებელი ორგანოების არჩევნებისას, რაც საქართველოს ორგანული კანონის საქართველოს საარჩევნო კოდექსის 119-ე მუხლის მე-7 პუნქტის საფუძველზე ასევე მიეკუთვნება საარჩევნო ბლოკის - „ნინო ბურჯანაძე - დემოკრატიული მოძრაობის“ მიერ წარსადგენ მაჟორიტარ კანდიდატებს.

მუხლი 10.

საარჩევნო ბლოკის წესდებაში ცვლილების შეტანის წესი

წარმოდგენილ წესდებაში ცვლილების შეტანა განხორციელდება მისი მიღებისათვის დადგენილი წესით - ა(ა)იპ მპგ „დემოკრატიული მოძრაობა - ერთიანი საქართველოსა“ და ა(ა)იპ მპგ „გაერთიანებული დემოკრატიული მოძრაობის“ ხელმძღვანელი თანამდებობის პირების მიერ ხელმოწერილი დოკუმენტით.

ა(ა)იპ მოქალაქეთა პოლიტიკური გაერთიანება

„დემოკრატიული მოძრაობა - ერთიანი საქართველო“

დავით ასპანიძე



ა(ა)იპ მოქალაქეთა პოლიტიკური გაერთიანება

„გაერთიანებული დემოკრატიული მოძრაობა“

ნინო ბურჯანაძე

